

佛說大乘僧伽吒法義經

佛說清淨毗奈耶最上大乘經

佛說隨喜尊者經

仁王般若陀羅尼釋

觀心論

佛說大乘僧伽吒法義經

五經合本



佛說大乗僧伽吒法義經卷第二 鴈

西天譯經三藏寶輪大師賜紫門臣金碧持等奉

詔譯

尔時有十八酤酖無知外道來詣佛
所各坐一面而作是言喬荅摩我於
世間最爲尊勝亦勝於汝何故汝今
獨號世尊世尊告言如來常勝汝何
勝邪彼諸外道又復說言我等勝汝
世尊告言無知外道汝何有勝但生

顛倒住顛倒中云何能勝汝等於自
若身若心諸苦逼迫尚不了知云何
能勝汝今諦聽當爲汝說諸佛卅尊
甚深法義令汝等輩皆獲利益時諸
外道聞佛是說生大瞋恚是時帝釋
天主見諸外道心生瞋恚持堅固杵
而欲摧壞諸外道輩時彼十八酤酖
無知外道生大驚怖涕淚悲泣哀告

如來而求救護于時如來忽於衆會
隱身不現時諸外道不見如來益加
憂惱涕淚悲泣同說偈言

失彼救護者

如失於父母

亦如空寂處

無伴侶獨行

江河或枯竭

魚鼈莫潛形

若無林木枝

飛鳥何所寄

不見於如來

我等亦如是

衆生諸苦惱

何人能救護

尔時十八酤酖無知外道說是偈已
從座而起雙膝長跪發大音聲普皆
得聞而作是言如來大悲兩足尊者
憐憫我等願為救護作是說已
尔時世尊於此衆會還復現形止帝

釋天主已告一切勇猛菩薩摩訶薩
言汝可爲彼諸外道輩宣說妙法于
時一切勇猛菩薩而白佛言世尊譬
如須彌山王以小黑山豈能爲比今
者如來令我爲是諸外道等宣說諸
法亦復如是世尊告言善男子汝可
觀察十方世界諸佛如來方便善巧
所作利益皆是如來智慧願力之所

建立此諸外道樂我說法汝先往詣
十方卅界觀察諸佛如來說法方便
是外道輩我當爲說一切勇猛復白
佛言今者卅尊令我往詣十方卅界
觀察諸佛說法方便未審以何神通
力去以自神通爲承佛力而去世尊
告言一切勇猛以汝神通及假如來
神力而去尔時一切勇猛菩薩即從

座起遶佛三匝作禮而去

尔時世尊告諸外道我今爲汝宣說
法要汝等當知生爲大苦因有身故
招諸怖畏所謂生有病怖生有老怖
生有死怖何緣名怖爲諸衆苦所逼
惱時生大怖畏所謂王法加怖怨賊
會怖風火水等飄焚沈溺如是等怖

造諸惡業苦報熟時生大憂怖如是
諸苦當知皆是因生而有世尊告言
諸外道等若能了知如是生法當得
離於一切諸苦時彼外道聞佛是說
生大怖畏咸白佛言我等今者皆願
離於生死怖畏是時世尊說是法已
時彼十八酤酖無知外道皆發阿耨
多羅三藐三菩提心復有萬八千酤

祇菩薩皆得十地以神通力現種種
形及諸神變現神變已咸皆陞於卅
尊四面諸寶樹下蓮華座上跏趺而坐
尔時如來入于三昧以善巧方便舒
金色臂示說法相經七晝夜是時一
切勇猛菩薩遊於十方諸佛刹土最
後至彼最上語言蓮華世界從於彼
土屈伸臂頃還來此土至世尊所遶

佛三匝生尊重心恭敬合掌而白佛
言我承佛教往詣十方諸佛刹土以
自神通過九十九千酤胝諸佛刹土
以如來神力過百千酤胝諸佛刹土
經七晝夜最後至於最上語言蓮華
世界於其中間過九十二千酤胝佛
刹見彼諸佛現在說法又過八十千

酤胝佛刹見彼八十千諸佛如來應
正等正覺同時出世我皆於彼恭敬
作禮又過三十九千酤胝佛刹見三
十九千酤胝菩薩以正法藏諮詢評
議同時皆證無上菩提我亦於是初
成正覺諸如來所各各恭敬作禮旋
遶又過六十酤胝諸佛刹土見諸世
尊安住說法我亦於是諸如來所恭

敬禮拜又過百酤胝佛剎見彼如來
將般涅槃我亦如是於彼佛所恭敬
作禮又過九十五酤胝佛剎見彼正
法將欲破壞心自思惟生大悲惱見
彼欲界色界天龍藥叉等各各憂惱
涕淚悲泣又過一佛剎正法久滅劫
火洞然大海須彌土地草木悉皆燒
壞但一空界無所依止過是界已至

于最上語言蓮華世界見彼四方及
虛空中各有百千酤胝諸佛世尊而
各坐於七寶之座爲諸衆生宣說妙
法我到彼已問諸如來今此世界名
字云何時諸佛中有一世尊而告我
言此佛世界號最上語言蓮華我時
於彼是世尊所右遶作禮而白彼佛

今此刹土化衆生主其名云何彼世
尊言名蓮華藏如來應供正等正覺
我時於彼諸佛世尊所而皆作禮乃
告之言今此五百千酤胝諸佛衆中
何者名蓮華藏如來時彼最上語言
蓮華世界諸如來中一佛世尊乃告
我言善男子我是蓮華藏如來應正
等正覺作是說已時諸如來隱身不

現同時化現菩薩形相于時唯見一
如來身我於是時頭面敬禮彼如來
足忽於地中涌出寶座時彼世尊示
我令坐我陞座已又復涌出無數寶
座而無有人陞是座者我時問言云
何如是衆多寶座空無人坐時彼世
尊乃告我言諸有情類不種善根薄
福德故尚不能見如是寶座况復能

得登是座邪我復白彼佛世尊言種
何善根而得是座彼世尊言善男子
若諸有情得聞是僧伽吒法義者是
諸有情能登是座暫聞尚爾何況有
人於此法義書寫讀誦修習之者一
切勇猛汝於過去由聞是法生信解
心今乃得至我剎土中我時又問彼

世尊言其有聞此僧伽吒法義所得
福德其數幾何彼時蓮華藏如來放
大光明現希有相其光徧照十方世
界我復白彼佛言有何因緣放大光
明現希有相彼佛告言一切勇猛汝
昔已聞釋迦如來說是功德我今爲
汝亦復略說一切勇猛譬如轉輪王
所王一大洲地滿中盛巨勝於意

云何如是巨勝是爲多不一切勇猛
而白佛言甚多世尊佛言一切勇猛
以是巨勝共爲一聚若人取以爲種
種於餘處如是一聚成無量聚若有
筭師還能筭計知其數不一切勇猛
復白佛言不也世尊無有衆生而能
筭計知其數者彼世尊言此僧伽吒
法義聽聞之者所得功德亦復如是

算數計量所不能及一切勇猛乃至
以一巨勝爲一如來同共聲讚聞是
僧伽陀法義所得善根無量福德不
能窮盡

于時一切勇猛菩薩而復告白彼世
尊言若復有人書寫受持讀誦演說
如是法義所獲功德願爲略說其數

云何時彼世尊而語一切勇猛菩薩
言善男子諦聽諦聽吾今爲汝分別
解說善男子譬如三千大千世界滿
中草木叢林根莖枝葉悉皆斷截如
指節量以一節量爲一輪王又復以
三千大千世界國土滿中所有土石
碎爲微塵復以一塵爲一輪王王四
天下是諸輪王所有福德若有衆生

善能筭計知其數否一切勇猛菩薩
而白佛言世尊如上所說彼諸輪王
所有福德其數無量而無有人筭計
籌量知其數量佛言如是如是一切
勇猛菩薩若復有人於此僧伽吒大
乘最勝法義而能書寫受持讀誦演
說所獲福德若以三千大千世界國
土滿中草木叢林根莖枝葉悉皆斷

截如指節量以一節量爲一輪王又復以其三千大千國土滿中所有土石末爲微塵以一微塵爲一輪王所有福德不可爲喻若復有人而能尊重是僧伽吒大乘法義一字一義是人所得福德倍勝於前一切勇猛菩薩若人於此僧伽吒經一心正念堅

固受持安住法中如是之人是名獲
得最上廣大勝法一切寶藏常得現
前出生無量功德義利饒益衆生爲
大法炬光明普照一切有情若以自
他種種煩惱悉皆摧伏天魔蘊魔煩
惱死魔及魔眷屬皆悉破壞一切法
門若性若相若權若實方便智慧悉
皆能入一切勇猛菩薩摩訶薩復白

彼世尊言若人於是僧伽吒法義修
習之者是名成就諸真實行名爲淨
行如是淨行名如來行如是之人甚
爲希有彼淨行人於晝夜中一切如
來常現在前而爲覆護得見如來亦
復能入如來刹土一切法藏而能了
悟如是之人臨命終時無諸怖畏顛
倒散亂安住正念而於後世不處胎

胞清淨化生遠離衆苦及諸煩惱一
切愛染不爲怨家男女眷屬種種纏
縛我時白彼世尊已時彼世尊復語
我言一切勇猛菩薩摩訶薩如來出
世如優曇華難可值遇又復聞說是
僧伽吒最上法義亦復爲難而於衆
中深生信解歡喜聞持不生誹謗轉

復爲難一切勇猛菩薩摩訶薩若人
聞此僧伽吒法義即能發生一切福
慧於八十劫中得宿命智六十劫中
爲轉輪王八千劫中爲天帝釋二萬
五千劫中爲淨居天三萬八千劫中
爲大梵王四空天主九萬九千劫中
不壞正信乃至未來五百劫中不墮
捺囉迦趣百千劫中不墮餓鬼二萬

八千劫中不墮畜生萬三千劫中不
墮修羅遠離鬪諍刀杖損害二萬五
千劫中離諸惡慧七千劫中常修善
慧九千劫中廣修檀度一切衆生若
有所須悉皆能捨心無慳惜色相具
足猶如如來萬五千劫不墮女身萬
六千劫離諸病疾諸苦因緣二萬五
千劫中得諸根通利萬九千劫中不

墮龍身六十劫中不生嗔恚七十劫
中所須充足離諸貧苦八萬劫中爲
銅輪王王二天下救護一切諸苦衆
生令得安樂萬酤胝劫中遠離愚癡
萬三千劫離諸諂誑及以惡行萬一
千劫常行忍辱乃至臨命終時離諸
苦惱心不動搖不生顛倒正念現前

不起嗔恚得見東方十二殑伽沙數
諸佛世尊南方十二酤胝諸佛世尊
西方二十五殑伽沙數諸佛世尊北
方八十殑伽沙數諸佛世尊上方九
十九千酤胝諸佛世尊下方百酤胝
殑伽沙數諸佛世尊如是等諸佛如
來悉皆現前而爲守護咸作是言善
男子勿生怖畏汝昔已曾種於最上

功德善根是故我等殞伽沙數百千
酤胝你庾多如來常現在前觀察護
念善男子汝見如是諸如來否時彼
白言我今得見如是世尊而我以何
善業因緣而得如是一切如來而來
守護世尊告言善男子由汝曾聞僧
伽吒法義以是功德我等諸佛皆來
守護而作是言世尊唯我一人得聞

是經功德如是況復盡令一切衆生
得聞是經所獲功德時彼世尊廣以
譬喻宣說衆生聞此經者臨命終時
及以未來所獲無量勝功德已復語
我言若有一切善男子善女人尊重
供養十三殞伽沙數諸佛世尊所得
功德其數甚多不如有人聞此僧伽

吒法義一四句偈所得功德復過於
彼我時復白是世尊言若復有人具
足聽聞是經典者所得功德其數云
何善男子諦聽諦聽若人於此僧伽
吒法義具足聽聞譬如三千大千世
界滿中巨勝以一巨勝爲一輪王若
復有人以諸珍寶種種庫藏布施供
養如是輪王所得福德不如布施供

養一須陀洹若復有人布施供養三千大千世界須陀洹人所得福德不如布施供養一斯陀含若人布施三千大千世界斯陀含人所得福德不如布施供養一阿那含人若復布施供養三千大千世界阿那含人所得福德不如布施供養一阿羅漢若復有人布施供養三千大千世界阿羅

漢所得福德不如布施供養一辟支
迦若復有人布施供養三千大千世
界辟支迦所得福德不如布施供養
一菩薩人若復有人布施供養三千
大千世界菩薩所得福德不如於一
如來所生淨信心布施供養若復有
人於三千大千世界諸如來所生淨

信心布施供養所得福德其數甚多
不如有人於此僧伽吒法義具足聽
聞所得福德一切勇猛何況有人於
是法義書寫演說受持讀誦解其義
理廣宣流布一切勇猛汝今但當於
僧伽吒最上法義生淨信心廣宣流
布所得功德不可思議於意云何彼
諸凡夫愚癡之人雖聞是經不生淨

信不能解了一切勇猛譬如有人入
於大海欲能盡知海水邊際汝謂是
人而能知否一切勇猛而白佛言是
人雖復入於大海而不能知海水邊
際一切勇猛又復譬如有人臨於大
海以手掬水而欲枯涸汝謂是水得
枯涸否一切勇猛而白佛言善逝世
尊如是之人徒自疲勞而無能得海

水枯涸一切勇猛彼諸凡夫無智之
者若聞是法顛倒疑惑不生淨信欲
於深廣生死大海到其邊際及以枯
涸無有是處一切勇猛如是之人雖
經八十酤胝殑伽沙數諸佛世尊出
現於世無有善根不能得見如來色
相不能得聞如是法義乃至值遇九

十酤胝殤伽沙數諸佛世尊百千酤
胝那庾多數諸佛如來出興於世宿
無善根不能得見彼諸如來不能得
聞如是法義不爲諸佛之所護念一
切勇猛若有智者宿植善根而得值
遇百千酤胝諸佛世尊於諸佛所發
淨信心得聞如是僧伽吒法而生信
解如是之人即爲諸佛之所護念一

切勇猛若人於此僧伽吒法而能書
寫一四句偈如是之人於此報盡當
過此九十五千酤胝佛土有一世界
名曰安樂往生彼國壽命長遠八萬
四千年歲劫數安隱快樂一切勇猛
菩薩摩訶薩若復有人造五逆罪一
切不善自作教他見作隨喜如是之
人若得聞此僧伽吒法祕密上乘一

四句偈所有罪業皆得消滅淨盡無
餘福智清淨遠離憂惱心善解脫

佛說大乘僧伽吒法義經卷第二

佛說大乘伽陀法義經卷第六

以上
缺一
紙

千酤胝衆生皆悉來集一一衆生各
舒百臂以種種香所謂末香塗香散
如來前藥王軍白言世尊我今已見
善逝我今已見如此勝事甚爲稀有
佛告藥王軍此諸衆生無知無覺如
幻如夢無有分別汝復諦觀時百千
酤胝衆生於須臾間所有百臂悉皆

殞滅不現藥王軍見是事已心大驚
疑白佛言世尊如是衆生所有百臂
於剎那間皆悉殞滅不存一二唯願
世尊爲我宣說佛告藥王軍此諸衆
生無知無覺如幻如夢亦不分別有
生滅相藥王軍我觀佛身與衆生等
汝於是義當善了知藥王軍菩薩白
佛言世尊云何是老衆生佛告藥王

軍無有知覺常處熱惱不久破壞是
老衆生復告藥王軍是諸熱惱衆生
汝欲見不白佛言世尊我願欲見尔
時月輪種如來即舒右臂垂其指掌
于時四方百酤胝人俱來集會上方
下方各五十酤胝衆生悉來同集是
諸衆生禮雙足已於如來前無言無
說默然而住佛無教誨尔時藥王軍

菩薩白佛言世尊此諸衆生於剎那
頃從何而來至世尊前云何無言無
說默然而住佛無教誨佛告藥王軍
汝還知不大地之性本無言說亦不
住立法聚之中本無知覺若解此義
與藥王軍同一名号等無有異藥王
軍如是老衆生不知有生不知有滅

亦不知有老病衰苦憂悲煩惱亦不
憎愛亦不輕毀亦不於諸眷屬生於
愛戀亦不於法而生懈倦無覺無知
無所造修是故各各默然而住尔時
藥王軍菩薩復白佛言世尊此諸逼
惱衆生何因而生何緣而至不了諸
法默然而住佛告藥王軍諦聽諦聽
此諸逼惱衆生非因鍛鑿金銀所成

亦非爐冶埏埴所得亦非刻木鑄石
爲之唯是男女和合相應所生若或
金銀銅鐵木石所成人或愛護尚可
久存旣唯父母生之復因先業造受
不同脩短有異而於世法亦不知有
工巧技術甘辛苦樂況今豈能生敬
信心能問能聽此諸衆生不久滅謝
還受諸報久處三界逼迫故名老人

藥王軍此諸衆生自作燒然無有休息譬如有人以杖撥火令火速滅前火未滅杖已煙生漸至焰起杖亦然之藥王軍如是衆生於此報中先業未滅復造後因漸漸增長後報復生隨惡流轉何能出離藥王軍諸佛如來大慈大悲愍諸衆生久處流轉不

惜軀命示現利生譬如有人違犯王
法爲王所獲繫閉牢獄枷鎖杻械常
處暗室幽暝所蔽無所見聞亦復不
知東西南北出之所由心雖疲勞欲
得解脫以闇暝故無由通達復有一
人曾繫是獄今雖得出念昔艱苦愍
此衆生設諸方便持小火種求入獄
中旣入獄已漸出微光令彼衆生更

互相見各各歡喜作諸方便可以逃
竄時彼丈夫見是事已更發火光令
漸增大展轉炎熾凡在獄中若有罪
若無罪悉皆逃竄唯彼閻室及彼丈
夫俱爲灰燼王聞是事悲感念言由
我制法衆生有犯繫諸牢獄遂致菩
薩亡身救濟可不痛哉尋出詔命於
我國中勿復造此苦惱衆生之具勅

令徧告國內人民今我國家不制法律不造囹圄有損人民之事更不復作汝等人民凡厥親緣當自遞生恭敬非親庶類勿相侵惱取與以仁進退以禮崇重賢明愛護物命凡百仕庶體我志焉由是一切衆生皆得安樂藥王軍諸佛如來爲利益衆生故

以智慧光破無明暗出三界獄喪失
身命如恒河沙數不以爲難何況一
身耶月輪種如來說是法時無量諸
天及阿蘊囉等皆大歡喜發菩提心
尔時諸天於虛空中歡喜讚嘆而說
偈言

大善勝福田

萬德皆圓滿

出世調御尊

能生諸善種

最勝清淨法
善巧方便力
安住涅槃界
勇猛常樂施
天人無上師
三界諸衆生
閉諸地獄門
此世及他生

堅固不可壞
擁護諸衆生
示同諸世間
隨類獲安樂
救度於一切
平等得濟度
餓鬼畜生趣
俱獲安隱樂

尔時世尊復於衆中而說偈言

善哉住佛刹

善哉見佛身

善哉聞妙法

善哉僧寶集

善哉僧伽吒

懺除一切罪

尔時藥王軍菩薩摩訶薩聞是空中
稱揚讚歎微妙法音踊躍歡喜合掌
敬禮月輪種如來足白佛言世尊今

聞諸天宣說如是微妙句偈稱揚讚歎甚適我願彼佛告言善男子汝今觀此會中年少衆生爲諸熱惱之所燒然受如是苦藥王軍菩薩白佛言世尊我今見是年少衆生受諸苦惱唯願世尊速爲除滅皆令安隱佛告藥王軍如是如是如汝所言我於今日當設方便令此年少衆生安住十

地藥王軍菩薩復白佛言世尊云何
如來能以大法化諸難化衆生令生
信解獲諸利益佛言藥王軍善哉善
哉汝能問佛如是妙義善男子汝今
諦聽我觀此諸年少衆生雖爲熱惱
之所燒然由宿因緣成熟力故而於
今日聞我說法一一皆當善根圓滿
得登十地

今時藥王軍菩薩摩訶薩聞是語已
心大歡喜涌身高八万踰膳那住虛
空中出無量音聲歌誦讚歎如來具
大慈悲以大願智當演無上微妙大
法誘接衆生令離熱惱住清涼地作
是語時三千大千世界六種震動時
三十三天主與無數諸天聞是音聲

歡喜踊躍各將眷屬如雲來集散衆
寶香及天妙花以爲供養禮佛畢已
住在一面復有八万四千龍王與諸
龍衆亦來集會無量夜又羅刹婆及
阿蘇羅健達縛緊捺落摩護落伽各
與眷屬無量大衆皆來集會復有無
量已墮諸大地獄衆生乘佛神力皆
來集會十方世界百千酤胝諸大菩

薩摩訶薩衆各運神通亦來集會
尔時藥王軍菩薩摩訶薩從空中下
曲躬合掌敬禮世尊而作是言甚盛
世尊甚盛善逝今於此會有無量菩
薩天龍八部并阿菟菟底王城一切
鬼王乃至地獄惡趣衆生皆來集會
住世尊前咸願得聞微妙法要惟願
世尊廣爲宣說尔時月輪種如來告

藥王軍菩薩言善男子汝等諦聽我
今所說微妙法蘊能除一切衆生熱
惱煎熬無量衆苦此妙法蘊是真梵
行是清涼法具足一切善法功德名
爲法蘊善男子我嘗爲諸衆生說諸
生苦清涼法要而諸衆生未深信解
復說老苦病苦憂悲之苦冤家會苦

愛別離苦心有所欲不和合苦臨命
終時衆苦共集名爲死苦而諸衆生
曾不覺悟善男子汝今復聽我爲汝
等略說死苦善男子若諸衆生臨命
終時有三種風內自生起初名亂識
次有散識後名滅識亂識風起身心
昏亂癡迷顛倒受諸苦惱漸漸增長
至散識風散識風起若身若心互相

離散無所安措唯有大苦相續不息
生滅識風此風生時識滅身壞是名
爲死此風亦得名刀名鍼亦名砂礫
何以故如刀割切如鍼毒刺如與砂
礫和雜磨研甚大苦毒甚可怖懼汝
等衆生能無怖邪今時會中年少衆
生聞佛說言識滅身壞名爲死苦甚
大愁惱而白佛言善哉世尊云何名

身佛言善男子四大五蘊積聚名身
六根完具裝嚴名身花鬘瓔珞香油
所塗名身生愚癡者貪愛名身能生
惡慧名身如負重擔名身增長苦縛
名身如水上漚名身亦如丘冢名身
善男子識滅身壞名死識起身生名
生識與名色託蔭母腹墮在胞胎日

月滿足既已成形內有三百六十骨
以筋纏絡外則覆以皮膚有八万毛
竅息風出入及諸血脉通注流轉復
有八万户蟲徧布其身始自初生迺
食其軀無有休息衆生識闇無所知
覺將命終時是諸蟲類互相交鬪無
有休息令其人身極不安隱展轉交
鬪甚有死傷乃至最後唯有二蟲相

鬬終于七日一蟲死已唯一蟲在最
後與人同時殞滅善男子愚癡凡夫
雖處世間由無明故與諸衆生日夜
爭競損惱物情無有休息如彼蟲類
不知生老病死衆苦相催唯求已勝
都無恐怖善男子往昔有一大善知
識常於衆中宣說如此生老病死種
種諸苦教誡教授令善修持得離苦

際以諸衆生慣習頑愚未善能行如是妙行是善知識還來化利此等衆生而告之言咄善男子我常爲汝分別解說諸妙法蘊生老病死種種諸苦常令汝等修行衆善棄背苦因趣求無上涅槃妙樂云何汝等不聽我言不修妙行不求解脫於閻浮提中

造衆惡業流轉諸趣善男子譬如大地假使有人若以大力執持大杵撞擊之時出大音聲世間諸聲無與等者善男子汝豈不聞佛出世間以四種人爲世福田生善種子廣爲利益一切衆生四種人者所謂比丘比丘尼優婆塞優婆夷是四種人如世大地若能親近禮拜承事供養則能令

汝獲得種種微妙善法遠離世間生
老病死等苦復能證得無上涅槃清
淨妙樂如以大力執持大杵撞擊大
地出大音聲等無有異時善知識爲
諸衆生而說偈言

諸佛出世間

常擊大法鼓

演說微妙法

廣度諸衆生

汝今見是事

應生勇猛心

滅除生死苦

安住涅槃樂

時諸衆生慇懃合掌向善知識即說

偈言

我以無智故

復遇惡知識

造作不善業

謂貪嗔癡等

常起於我見

破壞和合僧

廢轉妙法輪

毀除佛塔寺

於此勝福田

曾不種少善

於一切時中

常作諸過失

未嘗於父母

暫起孝敬心

出非法語言

輕毀諸賢聖

造此惡因故

必當墮地獄

自身受苦惱

無能救護者

可畏衆合獄

炎熱大阿鼻

如是諸獄中

展轉受衆苦

從此地獄出
謂刀兵蓮華
彼諸大地獄
不見彼獄門
蹈彼刀劒鋒
苦極身暫死
生死地獄中
地獄無邊際

復入餘獄中
黑繩沸屎等
縱廣百由旬
唯有受苦者
其苦難堪忍
復彼業風生
百千酤胝劫
衆生亦復然

以惡因緣故

相續不間斷

我造諸惡業

當墮彼獄中

唯願善知識

聽說罪惡因

我以貪愛心

造宅甚雄壯

雕鏤諸棟梁

藻飾極嚴麗

復置妙園林

廣列臺榭等

池沼花果樹

一一皆圓滿

庫藏積珍財
又於閑廐中
象馬牛羊等
妻子及妾媵
奴婢與妓人
常令晝夜中
但縱已之樂
自恃大富貴

莫能知筭數
廣收諸畜產
其數無有量
內外諸眷屬
其數亦無量
動作衆歌舞
不念佗人苦
作種種莊嚴

香湯沐浴已

仍以妙香塗

龍腦白旃檀

鬱金麝香等

塗已甚香潔

首戴七寶冠

臂釧及指鐲

皆用妙珍寶

以上妙真珠

貫之爲瓔珞

最上紫磨金

嚴飾作耳璫

柔軟善適意

蘇摩那瞻蔔

及諸異香者

結以爲花鬘

復著美好衣

謂上妙細氎

鮮白甚清潔

更以妙香薰

飲食最上味

甘脆頗香美

所供皆如意

暫無飢渴時

地敷好茵褥

履踐以游行

左右擁從者

勝彼神仙人

如是廣嚴飾

唯奉養其身

保護謂常安
富樂既具足
但恣染欲心
眼貪妙色境
鼻舌身意中
我嘗於一時
出乘大白象
侍衛若獐神

不生滅壞想
餘復無所思
造作不善業
耳樂適悅音
無不順情欲
復欲縱畋獵
從以七寶馬
見者皆怖懾

以彈落飛鳥
猛獸若當前
但取諸血肉
惡報唯自受
一朝病緣至
四大或增損
飲食不得下
良醫施妙藥

利箭射奔鹿
力士斷其命
令衆共噉食
誰是能代者
肢體不相隨
脉息亦衰微
寢臥不能寧
功效亦唐捐

父母及親友
拔髮空垂淚
我若命終已
鳥獸及諸蟲
形骸與神識
唯先所造業
善法如良藥

悲痛頗纏心
終無救濟術
棄在尸陀林
噉食稍充足
現在悉空無
當來受果報
能治貪恚癡

貪等既不生
我實無福慧
佛宣方便門
我自不能修
障善法因緣
唯佛大慈悲
戒法真實門
如我所造業

無因造諸惡
虛妄受人身
施戒忍辱行
聞亦不隨喜
何時當解脫
能救衆生苦
登者獲大利
深自生追悔

今對善知識

是故如實說

佛說大乘僧伽吒法義經卷第六

佛說大乘僧伽吒法義經卷第七鴈

西天譯三藏明因妙善普濟法諦鬘師具金剛持等奉詔譯

尔時月輪種如來爲諸年少衆生說
往昔善友化導因緣已復告藥王軍
菩薩摩訶薩言藥王軍是諸苦惱衆
生臨命終時以惡業故受斯苦報雖
有父母妻子眷屬内外親識不能救
護若無善種何由解脫尔時世尊復

說偈言

若作諸惡業
長時受極苦
常吞熱鐵丸
或灌洋銅汁
地獄大苦處
若無善方便
常親近善友

墮大地獄中
無有暫息時
猛焰然其身
上下皆焦爛
曾無快樂時
何由得解脫
聽聞微妙法

初習布施行
隨彼所應求
堅持具足戒
佗來逼惱時
日夜常策勵
觀察聖諦心
發生慧燈明

內外一切財
清淨故施與
無令有缺犯
安忍勿施報
莫爲懈怠欺
湛然如止水
滅除諸暗冥

滿足衆善法

解脫見諸佛

心行菩提道

慈愛於世間

救度諸衆生

增長成佛種

皆令得解脫

速成無上慧

尔時藥王軍菩薩摩訶薩與五百大
菩薩摩訶薩衆各各運大神力從座
而起涌身於虛空中現大威儀從容

詳序緩步而行其心決定安固大乘
遊戲三昧現諸神變或現猛虎示以
威雄或現師子自在無畏或現象王
有大勢力住法山頂高出羣峯無與
等者身放光明極大熾盛百千酤𦞦
日月光明不可譬喻是諸菩薩放此
光明行於日月之前年少衆生見是
事已白彼佛言世尊何因緣故是諸

菩薩現是稀有之相放大光明行於
日月之前佛言善男子汝今見是事
邪年少衆生白佛言世尊唯然已見
佛言善男子是諸菩薩各以自在神
通之力現大光明徧照世間常說妙
法化諸衆生欲令一切衆生皆得利
益安樂若諸人天亦能行此妙行亦
得如是神通變化及大光明能行日

月之前尔時藥王軍菩薩等從空中
下前詣佛所問評世尊世尊告言藥
王軍汝等見是三千大千世界六種
震動不藥王軍菩薩白佛言世尊唯
然已見然今我等不能了知何因何
緣有此震動況今我等亦有少疑欲
問世尊願佛慈悲聽我所問開示演

說彼佛告言善男子汝有所疑恣汝
爲問或過去或現在或未來等事我
當一一爲汝分別解說藥王軍菩薩
白佛言世尊且今此會中有八万四
千天子而來集會八万四千酤胝菩
薩衆亦來集會一万二千酤胝龍王
亦來集會復有一万八千神王二十
五千酤胝餓鬼毗舍遮等俱來集會

其數甚多何因緣故而共來集欲何
所作佛言善男子汝今諦聽當知此
諸大衆俱來集會皆是於此樂欲聽
聞佛所說法即於今日有得聞佛深
妙法音正慧開覺於煩惱縛即得解
脫者或有得聞如來妙唱離生老病
死種種諸苦住安樂法者或有即今
獲大善利出苦輪迴安住十地住十

地已得證如來清淨涅槃於諸苦惱
永得解脫消伏魔冤證真妙覺者藥
王軍菩薩復白佛言世尊大地六種
震動復是何等瑞相佛告藥王軍汝
今審諦觀察云何震動藥王軍菩薩
復觀察已白佛言世尊我已觀察見
是四方及諸方所有二十酤胝衆生

忽然生於此間復有下方二十酤胝
衆生從地涌出生於此間上方有二
十五酤胝衆生來生此間由是大地
六種震動不知此等是何瑞相佛告
藥王軍且待須臾汝自了知于時年
少衆生見是六十五酤胝衆生忽然
來生此間白佛言世尊云何此中忽
生如是衆生佛復告言善男子此等

衆生皆是汝之徒侶來生此間年少
衆生白佛言世尊此等衆生來生此
間亦有死不佛告年少衆生一切衆
生悉皆有死此亦有死時諸年少衆
生合掌向佛頂禮佛足白言世尊我
等今者更不能忍受如是生死流轉
願速解脫佛告年少衆生汝等能起
大精進不年少衆生白佛言世尊我

等今者親覩如來金色之身得聞如
來甘露妙法見諸菩薩摩訶薩等現
大神通諸聲聞衆無量天人集會聽
法願自精進懃修聖道不能忍受生
死流轉時諸年少衆生又復遠佛三
逆偏袒右肩慇懃恭敬禮卅尊足重
白佛言卅尊我等衆生衆苦所集甚

大熱惱於生死重擔極大怖畏何由
解脫唯願世尊攝受我等一切衆生
施令無畏得安隱住廣演妙法令諸
無智衆生開正慧眼熱惱衆生心得
清涼世世所生與如來俱

尔時藥王軍菩薩摩訶薩語彼年少
衆生言善男子汝等今者欲得聽聞
佛所說法入深義味邪汝等先當飲

食飽足然後可聽如是妙法得諸義
味藥王軍菩薩爲諸年少衆生而說
偈言

汝欲聞正法

當假飲食資

食飽力無畏

得真妙法味

尔時年少衆生語藥王軍菩薩言賢
者長老我不識汝汝爲是誰名字何
等我今觀汝色相具足威儀閑雅諸

根寂靜遠離怖畏七寶嚴身如功德
聚云何于今發此語言教我飲食然
後聽法尔時年少衆生復說偈言
惟賢者長老 善調伏諸根
必有大名稱 一切皆愛樂
已圓滿善法 無不證知者
云何教我言 飲食資身命

如我所知見
食已於腹中
設復增色相
當於惡道中
衆生造罪業
飲食爲因緣
營求大田園
眞珠寶瓔珞

飲食爲過因
成種種雜穢
惡法亦隨生
常受大怖畏
皆從飲食生
滋生種種欲
舍宅樓閣等
殊妙嚴身具

象馬及車乘
如是大富貴
富貴不長久
假使四大洲
七寶皆圓滿
輪王大富貴
雖有世神通
四王忉利天

奴婢亦無數
我實不愛樂
皆是無常法
爲彼轉輪王
具足有千子
我亦不愛樂
終歸如是處
夜摩及兜率

化樂陀變化

摩羅大天王

光潔有神用

自在力莊嚴

欲天大福樂

我亦不愛樂

五衰相現時

亦是無常法

初定中間禪

乃至色究竟

無色無別處

非想非非想

修定以厭欣

隨應離世縛

雖有大福壽
極經八万劫
諦聽大尊者
唯有佛如來
佛如日月光
輪迴三有苦
爲諸羣生類
令住不退轉

我亦不愛樂
終是無常法
我等所知見
真是歸依處
普照諸冥闇
斷滅今不生
宣說微妙法
證於無上道

故我嗜佛法

甚於飲與食

尊者雖憐愍

殊非我本意

尔時年少衆生重復恭敬藥王軍菩
薩摩訶薩已而告之言尊者大士汝
名何等我願得聞唯願慈悲示我令
知尔時年少衆生而說偈言

善哉大尊者

具足慈悲行

衆生皆樂見

故我恭敬禮

汝名字何等

惟願爲我說

若得聞隨喜

頂戴常受持

尔時藥王軍菩薩摩訶薩語年少衆
生言汝等今者欲聞我名當自觀察
合掌審聽藥王軍菩薩而說偈言

汝欲聞我名

我名不可得

汝欲須知者

如空中捕影

時年少衆生一心頂禮藥王軍菩薩
白言尊者尊者名字功德微妙祕密
甚深惟願尊者憐愍我故表示令知
今時年少衆生重說偈言

我觀一切法

名字悉空無

願示生死人

甚深微妙義

今時藥王軍菩薩爲諸年少衆生表
宣名字而說偈言

年少汝諦聽

我今說自名

應生清淨心

當獲大法利

我以衆生類

種種病所纏

善巧處妙方

廣施救濟法

藥美如甘露

祛病速如神

由此立假名

名爲藥王軍

貪欲病最大

惱害世衆生

此病爲因緣

滋生諸苦惱

佛說大乘僧伽吒法義經卷第七

第七卷

授以無常藥

祛病速如神

由此立假名

名為藥王軍

瞋病熱如火

焚燒寂靜心

忿恨惱恚害

展轉互相生

授以慈悲藥

祛病速如神

由此立假名

名為藥王軍

愚癡病可怖

覆沒智慧心

流轉惡趣中
授以方便藥
由此立假名
由斯三種病
已經無數劫
諸佛出於世
慈念諸衆生
現大神通力

不得聞正法
祛病速如神
名爲藥王軍
展轉諸病生
未遇解脫因
是爲天人師
如親愛已子
廣開正法門

愚癡顛倒者

迷謬不能入

我以方便力

隨佛出世間

觀察病本因

處料救濟法

應病授良藥

服者得痊除

年少汝應識

我名藥王軍

今時年少衆生聞是藥王軍菩薩說

自名已歡喜踊躍得未曾有即起合

掌瞻仰頂禮而伸讚歎復說偈言

菩薩藥王軍

救世大悲者

精進利羣生

長時無懈怠

念彼輪迴苦

速若救頭然

我以志誠心

稽首歸命禮

今時藥王軍菩薩摩訶薩告彼年少

衆生言善男子我娑婆世界有佛世

尊名釋迦牟尼如來應供正徧知明

行足善逝世間解無上士調御丈夫
天人師佛世尊能以大慧教菩薩法
攝化衆生汝等應往親近禮拜令汝
速聞無上妙法藥王軍菩薩爲諸年
少衆生而說偈言

年少汝當知

佛德無有上

世間出世間

福智皆圓滿

具相三十二

八十隨形好

常以大智慧

救度諸含識

神通力無畏

高顯若須弥

智慧不可窮

淵深如大海

善巧設方便

隨順化衆生

瞻禮歸依者

皆得安樂果

尔時年少衆生復白藥王軍菩薩言

仁者慈悲憐愍我故授我法藥令我
飲服解脫衆苦得安樂住然今我等

不見釋迦如來三十二相八十種好
云何得度藥王軍菩薩語年少衆生
言汝觀上方有何等相諸人聞已即
觀上方見三千臺從空而下七寶莊
嚴寶珠羅網以覆其上出衆妙香光
明豔赫年少衆生問藥王軍菩薩言
仁者此諸寶臺微妙花座是何等相

藥王軍言此是汝等所坐之座若坐
此座速至佛所瞻禮如來則能疾得
甘露妙法年少衆生白言仁者我等
不知如來所住之處亦不知彼所行
之路當詣何方禮覲如來藥王軍菩
薩言善男子如來尊德如須弥山如
來智慧深如大海不希供養不樂禮
敬雖有惡魔來侵不共諍論若能歸

依佛者則得不入死門得法總持門
十方諸大菩薩欲見如來以自智力
種種觀察尚不能見況汝等邪善男
子如來如空中塵無有住處汝等若
能以清淨心勿有希願但行禮拜即
見如來今時年少衆生受教陞座適
坐華座即見如來身真金色如大金
山三十二相八十隨好以自莊嚴威

德特尊衆善具足在大衆中坐大蓮
華寶師子座是諸年少衆生歡喜踊
躍即起合掌一心頂禮瞻仰尊顏目
不暫捨

尔時世尊出迦陵頻伽之音讚言童
子善哉善哉汝等能以清淨智願勇
猛精進來此娑婆世界禮拜親近我

釋迦牟尼世尊應正等覺

今時世尊熙怡微笑從其面門出八
萬四千種種色光所謂青黃赤白紅
紫縹色頗胝迦色徧照三千大千世
界上至阿迦尼吒天下及諸惡地獄
遇斯光照衆生皆獲一切利益安樂
其光照已還至佛所遶佛七匝從佛
頂入

尔時藥王軍菩薩從座而起合掌向
佛白言世尊如來所爲甚深稀有必
無虛設今日微笑笑必有因惟願慈
悲爲我開說佛告藥王軍汝今能於
大衆之中作大師子吼問於如來如
此稀有微妙大事汝今諦聽爲汝解
說善男子汝今見此三千七寶大華
座不藥王軍言唯然已見佛言善男

子今此華座是諸年少衆生得坐此
座即獲圓滿一切善根證得一切善
法樂住登于十地乃至當得阿耨多
羅三藐三菩提建大法幢擊大法鼓
無量天人聞是法已悉獲利益無量
地獄衆生仗是法力解脫苦報得安
樂處是時會中有九十酤酖諸老衆

生得須陀洹果佛告藥王軍汝且觀
是四方上下諸大菩薩

尔時藥王軍菩薩即觀四方見東方
界五十酤胝殑伽沙菩薩而來向此
南方界六十酤胝殑伽沙菩薩而來
向此西方界七十酤胝殑伽沙菩薩
而來向此北方界八十酤胝殑伽沙
菩薩而來向此下方界九十酤胝殑

伽沙菩薩而來向此上方界百酤胝
殑伽沙菩薩而來向此是諸大菩薩
衆到此會中恭敬供養歡喜讚歎頭
面禮卅尊足遶佛三匝各住一面藥
王軍菩薩白佛言卅尊我今見是四
方上下諸大菩薩來此會中今虛空
中忽然見有黑色黃色種種相現復
是何緣願佛開說佛告藥王軍此是

惡魔及諸眷屬欲來至此爲諸年少
衆生受是位故欲作障難破壞是事
故來至此藥王軍汝適見是四方上
下無數諸大菩薩種種色相種種形
貌種種威力者故來擁護年少衆生
令其惡魔及諸眷屬無能得便是惡
魔衆亦皆隨喜慚愧而退佛說是經

已一切勇猛菩薩藥王軍菩薩諸大
菩薩等一切老衆生年少衆生與無
量天人龍神一切大衆皆大歡喜信
受奉行禮佛而退

佛說大乘伽吒法義經卷第七



佛說清淨毗奈耶最上大乘經卷上門

同譯經西天寶法大師賜紫沙門

智吉祥

等奉

詔譯

如是我聞一時世尊在王舍城鷲峯
山中與大比丘八千人俱諸大菩薩
萬四千人欲界色界無數天子爲聽
法故皆悉雲集復有恭敬寂靜自在
天子到於佛所放身光明歡喜踴躍
合掌恭敬五體投地頂禮世尊右繞

三匝却住一面長跪合掌而白佛言
善哉世尊是妙吉祥童真菩薩於何
國土教化衆生今此會衆俱生渴仰
咸欲見聞彼大菩薩宣說清淨最上
法要令各獲得平等解脫時佛世尊
告語寂靜自在天子過此東方十千
國土有佛世界名曰妙寶其國有佛
號曰寶幢應正等覺出現於世以方

便智安樂衆生是妙吉祥童真大士
於彼佛國而爲上首爲諸菩薩及諸
有情宣轉諸佛甚深法要隨上中下
信等根力各得如來清淨法門爾時
寂靜自在天子重白佛言惟願世尊
以大慈悲眷念憐愍此會衆生令得
了知童真大士在彼佛國所說之法

隨自根力有所證悟世尊告語寂靜
天子彼妙吉祥所說諸法一切聲聞
辟支佛等所有智慧皆不能及若說
法時放大光明現希有相能使魔宮
悉皆不現魔與魔民自然摧伏有輕
慢者而能速滅種種慢心自能生起
增上信樂未發正道菩提心者而能

速發已發心者使令增長於諸善法
堅固不退於諸衆生摧伏攝受平等
利益無怨親相恭敬寂靜自在天子
聞佛所說身意快然歡喜讚歎復作
是言大悲世尊以何因緣令我等輩
瞻奉恭敬童真大士親聞妙法于時
世尊寂然無聲觀此會衆與彼菩薩
根緣成熟即放眉間白毫光明遍照

三千大千世界及照東方十千佛土
於妙寶國寶幢佛會其光是曜照彼
佛刹隱暗幽谷無不等明彼國菩薩
聲聞緣覺四衆八部同聲讚請寶幢
如來今此國土現大光明是何因緣
而有此相寶幢世尊告諸菩薩及大
衆言過此西方十千國土有佛世界
其名娑訶有大智仁號曰釋迦具一

切智一切種智六度四心隨機演法
由昔所修勇猛精進願於彼國五濁
世中出現成佛轉正法輪破諸邪見
隨順五乘善說法要令各悟入諸佛
知見勇猛精進圓會一乘譬如天雨
無不等潤彼會時機寂靜天等咸欲
見聞童真菩薩久懷渴仰心未暫捨

如子思母如民思王如裸思衣如飢
思膳如貧思寶如暗思明故彼世尊
放大光明爲利有情作諸聖行說是
語已告妙吉祥童真菩薩應往彼國
隨順如來廣開法要吹大法螺振大
法鼓興大法雲雨大法雨利益安樂
天人衆會爾時妙吉祥童真菩薩與
自眷屬十千菩薩俱乘佛力即以神

通於剎那頃到此娑訶釋迦佛所住
於空中而不現形放種種光猶如雲
蓋遍覆虛空其光之中垂布種種上
妙寶香雨衆天花色妙無比光中化
生天子天女作天妓樂歌唄供養釋
迦世尊十方世界地皆震動踊出無
量妙寶香花皆現在前莊嚴佛會其
有衆生宿植善本久修梵行若於福

佛說清淨毗奈耶最上大乘經卷上

第四張門字號

慧分有修習則見自身在光明中與
佛菩薩天人四衆同處法會身意泰
然無諸怯弱其有衆生無信樂心不
修善因輕拒賢善近惡知識貪嗔愛
慢諂曲嫉妬常現在前雖同一國於
佛境界冥然無知如昏醉人處夜暗
中殊無醒覺於時寂靜自在天子與

大衆俱見是光明希有之相咸生歡
喜從坐而起復白佛言希有世尊今
此國土以何因緣天雨妙寶垂衆香
花作天妓樂現希有事佛告天子并
諸大衆是妙吉祥童真菩薩與其眷
屬十千菩薩從妙寶國而來至此雨
天香花作天妓樂現神變相作供養
事於時寂靜自在天子及諸大衆咸

皆作禮俱唱是言聖者大慈願爲我
等於此佛會廣宣妙法令各發起最
上乘心及爲未來邪見衆生開闢正
道斷煩惱縛得心自在作是語已童
真菩薩與自眷屬諸菩薩衆從空而
下繞佛三匝頂禮卅尊退坐一面恭
敬寂靜自在天子殷勤合掌頂禮問
評仁者大士在彼佛國以何法要示

導衆生令我等聞皆得清淨解脫安
樂童真菩薩告天子言汝善讚問如
是法要彼國衆生無諸慳慙樂修布
施調伏諸根守護戒德由忍辱力真
恚嫉妬常不現前晝夜精勤於善無
懈能於法義審諦思惟愛樂寂靜智
性聰慧所學易成善惡品中有力思

擇貪嗔癡慢設復現前便能悔滅遠
離邪見不斷善根行真實行習甚深
法身心安住無顛倒想亦無彼此愛
憎之心善男子彼國衆生久修善行
於諸法義宿勤熏習了悟世間境相
虛妄體性不實煩惱縛法難以拘礙
去來見在唯是一心心若不生幻相
何有善男子而此心性即是真心本

來寂靜不生不滅無去無來猶若虛
空湛然無動不被境相之所動搖於
真實法漸次悟入於一切境及以如
來言音色聲悉是空相實性義中無
諸名字所以者何如來所修因地行
願遠離虛妄名相分別安住真實無
相理中但方便智隨順衆生根性差
別稱彼物機說諸妙法如一味雨普

得所滋越煩惱河到菩提岸淨信天子汝修淨行當離虛妄於一切相而勿執著了諸染法本性虛妄清淨一心遠離業障是真佛子是真菩薩汝等天人菩薩衆會從久遠來根本趣求菩提果法應當先行施等諸行堅固無捨離諸顛倒虛妄分別漸次證

得真實解脫

爾時恭敬寂靜自在天子復白妙吉祥童真菩薩言云何而修真實義諦妙吉祥童真菩薩言修真實諦具諸智慧當以上妙飲食湯藥種種供養心無退轉復修禪定觀智圓成常行是行不離觀想復勤修習深入佛慧天子汝可當學諸大比丘不作諸惡

常住法界不生外想常住法界不隨
愚夫常住法界行安樂法常住法界
捨不安樂常住法界唯學佛法圓滿
寂靜永斷輪迴了悟涅槃及以煩惱
本性平等而得解脫是真比丘與諸
菩薩等無差別常作觀想世間塵勞
生死根本顛倒妄想悉皆是空何以
故如來常說生死涅槃名字皆空譬

如陶器及諸寶器質異相同如空平等如是天子應當觀想一切有情煩惱染緣性本幻妄天子菩薩所修諸大乘行先須修習真實義諦若不修習聖真實諦則無有法化諸聲聞是故菩薩捨聲聞行行真實行雖修大乘捨而無著爲於聲聞及諸有情說

諸方便與善安樂令作正觀喜樂大
乘真實義諦遠離輪迴常樂淨處天
子是名菩薩令諸衆生及聲聞人修
學菩薩真實聖行汝等應當如是修
學菩薩正行常行恭敬於一切時心
不散亂心常謙下不生高慢亦復不
生諸餘染慧唯修觀想行善方便趣
向菩提此即是名菩薩真諦二乘空

智無有悲念愛樂菩提遠離流轉不
還世間無善方便引導衆生於佛菩
提心生怯弱妙吉祥菩薩復告恭敬
寂靜自在天子汝諸天子設復輪迴
爲求佛法心未嘗懈由是功德眷屬
無數自然富貴珍寶盈溢福德廣大
如海無量所居宮殿嚴麗殊特飾以
妙寶自在富樂汝爲諦求無上菩提

一切捐捨不生愛樂如是天子菩薩
摩訶薩修菩薩行捐捨財物及諸珍
寶亦能捨於頭目髓腦行大慈悲諸
波羅蜜悉皆修習如披甲冑有大勢
力福智如海具足了知大乘功德化
諸有情從於佛土至於佛土一切不
遺得真實諦天子汝等諸天微妙上

服所出異香遍布餘處有種種香以
真實相學佛智慧於佛功德戒定慧
香解脫知見種種之香等無有異此
香能斷生死塵勞煩惱根本汝諸天
子於往昔中以衆香花珍寶衣服晝
夜六時作諸供養正念思惟持諸淨
戒百千俱胝那由他劫願力圓成聞
說如來戒定慧等五種妙香欲盡煩

惱自然感得身出妙香與佛菩薩等
無有異爾時恭敬寂靜自在天子復
白妙吉祥童真菩薩言寶幢如來國
土之中諸聲聞衆有何所爲修真實
諦時妙吉祥童真菩薩告天子言彼
諸聲聞由信重法乃至生滅不離於
法而能出過四果四向非須陀洹悉
能出過一切惡趣非斯陀舍而能往

來教化衆生非阿那含知一切法無
去無來非阿羅漢亦能受於三千大
千一切供養及非獨覺佛所說法悉
皆能持不離於貪而無貪縛不離於
嗔不爲嗔縛不離於癡而無癡縛不
斷煩惱離諸暗障不離塵勞勤行精
進誘進衆生不計我人令修正念遠

離身心出生神足五根曉了摧一切
法五力現前趣於彼岸住深禪定於
法界中智慧明了遠離無明漸證解
脫而以肉眼觀諸佛國而作佛事復
以天眼見諸衆生輪迴生死又以慧
眼觀衆生心本具真實復以法眼見
一切法本性平等復以天耳遙聞一
切諸佛說法悉皆了知復聞百千俱

脤衆生覺觀之聲知心善惡以神通
力遊諸國土無不周遍雖復往來若
身若心安住法界決定修學或現其
形無麤色相具功德力種種莊嚴威
德光明名稱顯著由戒定慧之所薰
修於諸世間一切煩惱無所染著於
佛言教辯才博聞以智慧明破諸黑
暗得陀羅尼觀諸聲聞及辟支佛唯

佛智慧無有窮盡何以故如來功德
由如大海正念定慧喻若須彌於三
摩地勤行忍辱降伏諸魔摧破外道
得善安樂諸法之王心得自在亦如
虛空遍入一切非所能喻天子當知
彼寶幢佛所諸聲聞衆觀想思惟如
是具足說是語時而此會中五百比

丘五百優婆塞五千天子聞妙吉祥
童真菩薩說是語已作諸供養供養
世尊及諸菩薩復白佛言我等今者
皆願求生寶幢佛國如彼聲聞達諸
法義於時世尊告諸大衆汝等當發
無上道心不忻小果求大菩提方能
得生寶幢佛國時比丘等聞是語時
皆發阿耨多羅三藐三菩提心由是

如來而爲授記汝等當來決定往生
彼佛國土

佛說清淨毗奈耶最上大乘經卷上

佛說清淨毗柰耶最上大乘經卷中門

同譯經西天寶法大師賜紫沙門臣智昇等奉詔譯

爾時恭敬寂靜自在天子復白妙吉祥童真菩薩毗柰耶法有其幾種使諸衆生云何修習漸次證入諸佛智慧唯願大慈爲我等輩宣說清淨解脫法門時妙吉祥童真菩薩告天子言我聞寶幢如來所說毗柰耶法本

性平等體無有異由佛如來隨順衆
生根性頓漸方便開示禁禦有情假
立多種所謂法界無邊衆生無邊戒
亦無邊衆生無始慣習熏修於情非
情迷惑顛倒於違順境起憎愛心妄
結業因自沈流轉故佛世尊隨宜開
導戒律因緣稱彼物機各生意樂譬
如清淨摩尼寶珠應順人心現種種

物各得隨時濟自所乏此毗柰耶亦
復如是隨諸衆生之所受持見在未
來得如意報又如世間海水深廣於
諸川澤無不舍容一切有情一切珠
寶依之而住此毗柰耶亦復如是隨
諸衆生樂欲差別故分諸乘受持有
異任其種性各得所依功德珍寶皆

悉具足故毗奈耶是諸衆生一切善
法依止住處卅尊大慈平等利益觀
諸衆生猶如一子爲人天性說三歸
五戒如乘小筏得渡溝河近達彼岸
人天乘此善戒功力超越三塗煩惱
業水爲聲聞人受毗奈耶是趣大乘
基址聖道隨心說戒戒無差別逐境

論心戒成無量爲聖性人略說二種
毗柰耶法謂即聲聞及與菩薩是二
種戒力用不同故成別異聲聞所行
唯專自行不務利他見苦有情心無
悲愍不生救護菩薩修習損已益物
於自身命眷屬財寶爲守淨戒無少
慙惜不憚寒暄積集善利冤親相對
歡喜普滋不作順違慈心攝受又聲

聞人獸畏生死求自涅槃知苦斷集
證滅修道遠離憤鬧愛樂空寂菩薩
用心不怖生死不住涅槃願於惡時
安立正道又聲聞人於魔魔民唯求
捨離不樂任持菩薩勝行見諸極惡
邪行有情方便調伏軟言攝受令捨
邪道爲自眷屬又諸聲聞於所受持
毗奈耶法猶如世間陶石之器或有

破壞不能復完如多羅無心不復生
長針鼻折缺匪堪重用入斷其頭無
能還活菩薩戒法體性如金成其寶
器設有所損性有堪任體本金故還
復成用又聲聞人雖以堅持作無作
戒而於十力四無所畏未有所證唯
菩薩人漸次修習如來福慧汝善男

子諸聲聞人於菩薩法不得自在身
爲相累心被境縛由持淨戒定慧見
前自乘聖因雖皆成就於究竟道最
上菩提而未證得與諸菩薩所有戒
定智慧勝力功德道品不可爲比說
是語已爾時世尊讚歎妙吉祥童真
菩薩善哉善哉汝善學佛宣說聲聞
菩薩所有清淨毗奈耶法令諸衆生

隨自根心各有修證善男子此毗奈
耶功德甚深不可思議我今爲汝及
諸大衆重略宣說清淨最上秘密尸
羅令各了知持犯名相漸次證入諸
佛智慧汝善男子天人衆會慇懃恭
敬諦聽思惟此清淨法三世諸佛之
所尊重三世菩薩之所隨學諸佛菩
薩所有微妙福德智慧皆從此生若

但聞名少時信受亦獲十種殊勝功德一者智慧具足二者依佛隨學三者深信大乘四者善願堅固五者心不散亂六者遠離惡報七者常遇善緣八者心無纏染九者三昧現前十者得成佛道暫修少善獲果尚多何況長時心無退捨善男子此清淨法

衆聖源流諸佛根本喻如大海水無
邊際大身衆生歡喜愛樂長時遊戲
心無厭足菩薩所行毗柰耶法體性
深廣用無邊際功無限量菩薩愛樂
終無厭捨世間所有陂池之水有情
在中雖以爲樂水本淺近不久枯涸
大身衆生甚不樂住其有細流漸入
大海咸同一味聲聞所持毗柰耶法

非菩薩人之所愛樂亦復能爲佛果
正因名相有殊體實無異于時會中
一萬二千諸天子衆聞佛卅尊方便
譬喻種種讚歎微妙甚深毗柰耶法
皆各發起阿耨多羅三藐三菩提心
頂禮卅尊俱唱是言我等今者皆願
當學摩訶薩埵根本聖因教化衆生
令各調伏根識清淨漸次修行至如

來地爾時世尊告天子言汝等往昔
已曾親近供養諸佛於菩薩乘久植
善本欲學最上清淨毗尼必得成就
應當發起精進勇猛堅固道心不被
煩惱之所纏縛五欲幻相深生厭捨
了知貪愛生死苦源覺悟無明輪迴
根本密護諸根堅意不犯初中後夜

正念現前邪見妄心不能迷亂我人
衆生及與壽命自性本空五陰六塵
和合聚散尋伺覺觀分別緣生而無
實體如是天子應當了知過現未來
世出世間一切諸法本性平等猶若
虛空究竟寂靜

尔時恭敬寂靜自在天子白佛言世
尊今此會中是妙吉祥童真菩薩善

能宣說一切法要令諸衆生各有開
解於最上乘毗奈耶法漸次修學方
便悟入我今復欲問彼菩薩如來所
有因地行願平等清淨解脫法門唯
願世尊慈悲憐愍聽我諮問摩訶衍
曩最上法義使我等輩及於未來一
切衆生戒見具足不墮邪命今時世
尊讚歎寂靜自在天子言善哉善哉

能以方便利樂衆生今正是時宜應
請問于時天子承佛威力歡喜踴躍
詣妙吉祥大菩薩前嚴整衣冠威儀
具足五輪踞地慇懃作禮禮已讚言
仁者大士我今諮問如來所有諸法
之要以何爲門令諸衆生入如來家
得正覺道唯願慈悲爲我等輩開示

演說于時菩薩在大衆中身放光明
容貌怡悅端正殊妙威德特尊振大
雷音作師子吼告天子言如汝所問
諦聽思惟世尊大慈正遍知者證知
我今爲汝略說善男子一切衆生從
本已來迷惑顛倒不覺正因增長我
人妄構生滅由貪瞋癡爲生滅體如
繩縛物無有自在永繫三界遠無出

期深處塵勞不得清淨故於法門無
所悟入善男子一切諸法本性平等
無有高下愛憎之相無別法性成多
衆生非多衆生有別法性故衆生法
即如來法故衆生性即如來性能如
是知能如是信於諸法性不生疑謗
以此爲門入如來家得正覺道名眞
佛子精勤修習植衆善本漸次除斷

煩惱蓋纏初中後夜心常醒覺密護
根門無令放逸識生滅相了知我法
名義俱空假合幻緣不能迷動如是
修習是諸菩薩真實平等解脫法門
善男子一切衆生顛倒既久煩惱愈
增失於如來律儀淨戒四攝六度無
以見前於真實法不深愛樂自興異

見邪妄推度朋黨惡人憍慢懈怠恣
情縱意橫構業緣植流轉根造生死
本因果不斷惑苦相續念念交遷無
得安隱不覺自身諸根四大假和合
成藉因緣有因緣勢在假名呼召住
世時分猶如幻人來往動轉緣勢力
盡四大散滅身相歸空當知住世色
力眷屬如夢所見名體非實是名衆

生虛妄顛倒入生死門善男子一切
衆生從無始來慣習慳慳於自內身
不行惠捨唯深耽深晝夜愛著俄尔
無常不復暫住如寄舍人屋宇敗壞
別寄他舍色身敗壞心識隨緣異趣
寄生惟留殘軀空成濃血何可愛著
復於外財金帛錢寶計念鄙惜無片
捨心不知此物本性聚散流轉世間

妄恃豪富遠待長年不續善因恣情
娛樂福緣殆盡水火風災劫掠時至
財物耗散眷屬別離見受餘殃後沉
惡道因果感應永處貧乏由内外物
不行布施於七聖財無復能得諸大
菩薩於自内身眷屬財寶無所吝惜
見有求者如法施與是名菩薩布施

法門善男子一切衆生從無始來隨
逐魔道不護諸根縱貪嗔癡違越梵
行於三寶所無敬信心不樂律儀唯
行放逸喜煞衆生習不與取好處汙
行言不真實飲噉非食嘗無厭足聲
聞緣覺菩薩大人作無作戒曾不親
近人天善法亦不修習來往三塗無
有間斷諸大菩薩於佛所說毗奈耶

法清淨禁戒乃至無有如毛頭許而
不信受是名菩薩淨戒法門善男子
衆生無始惑於法性於無我處妄執
我人嗔恚見行相續嫉妬常懷諍訟
損惱有情遇苦違緣復加逆害諸大
菩薩於我及所了知爲空設遇冤家
欲相謀害以憐愍心歡喜隨順不生
加報是名菩薩忍辱法門善男子一

切衆生從本已來身心懈怠著諸垢
穢退失善法五欲醉亂常無醒覺親
近惡友違善知識於諸如來一百四
十不共功德清淨法門不能隨學於
諸菩薩自利利他饒益行門亦不了
知於辟支迦十二因緣順逆觀行不
能明解於聲聞人四聖諦法染淨因

果無所趣入於人天乘世間善法無
信向心唯積惡緣以增懈怠而諸菩
薩由種性力心不怯弱人天二乘菩
薩如來所有上行發勇猛心遍勤修
習雖遭衆苦終無悔惱是名菩薩精
進法門善男子一切衆生心意狂亂
晝夜放逸種種覺觀於諸塵境念念
隨逐若身若心曾不安息菩薩摩訶

薩由修淨戒禁禦六根深入禪那身心寂靜是名菩薩禪定法門善男子一切衆生愚癡闇鈍多無知覺於佛所說三十七品四無量道慈心濟物與樂法門悲愍一切苦惱衆生拔苦法門其性柔和愛樂衆生喜悅法門遠離憎愛無冤親想平等法門身受心法四念安住無我法門修四正斷

遠離障染清淨法門備四神足輕舉
動轉運通法門具五善根增長功德
出生法門五力圓具破諸魔冤摧伏
法門七覺支分八聖道品淨功德門
皆不曉了而諸菩薩具足修習福德
智慧於修多羅毗柰耶法及阿毗曇
悉能深解是名菩薩智慧法門今時

寂靜自在天子聞妙吉祥童真菩薩
所說種種清淨法門發希有心堅固
不捨以柔軟音復問菩薩仁者大士
云何名爲法界性門菩薩荅言善男
子一切諸法有爲無爲體用周遍無
所不攝名法界門又問法界以何爲
界荅天子言謂有情界及無情界爲
一法界重復問言如是法界有邊際

不菩薩告言汝意云何如虛空界有
邊際不答言不也菩薩告言虛空無
邊大地無邊衆生無邊法界無邊天
子問言仁者大士此法界性可分別
不菩薩答言法界性者不住於色不
住於聲不即衆生不異衆生寂靜湛
然遍一切處絕諸戲論法界之名本
亦不有天子問言仁者大士具修幾

緣有如是心辯才分別能說諸法童
真菩薩告天子言汝見世間幽巖山
谷有幾種心出諸音響而應外聲天
子荅言山谷無心猶外有聲相合生
響菩薩告言我今亦尔我本無心分
別諸法隨衆生性應緣所說天子問
言仁者大士爲依何住速能成就阿

耨多羅三藐三菩提童真菩薩答天子言菩薩修行住五種法無有間斷速能成就阿耨多羅三藐三菩提何等爲五謂菩薩摩訶薩最初發起大菩提心慤懃勇猛志求佛道於其中間不起一念聲聞緣覺下劣之心是一無間菩薩摩訶薩最初發心救濟衆生而於自體身手支分眷屬財寶

無所愛惜亦不能生暫時慳吝是二
無間菩薩摩訶薩最初發起慈悲之
心於諸衆生悉欲度脫其中未嘗少
有懈怠是三無間菩薩摩訶薩最初
發心修菩提行知一切法本無自性
從緣而生從緣而滅決定信忍未嘗
於中生諸異見是四無間菩薩摩訶
薩始從初發大菩提心具正知見行

平等道遠離空有斷常之病獸有漏
法不著三界是五無間善男子菩薩
摩訶薩住五無間生精進心速得成
就阿耨多羅三藐三菩提法天子又
問仁者大士頗有凡夫衆生住五無
間亦能成就阿耨多羅三藐三菩提
耶菩薩荅言可得成就天子問言以

何因緣而得成就菩薩荅言於一切
法了知爲空無疑無謗作者受者俱
無自相如是修習故得成就阿耨多
羅三藐三菩提
佛說清淨毗柰耶最上大乘經卷中

佛說隨勇尊者經

西天譯經三藏朝奉大試光祿寺卿傳法大師賜紫沙門日旃護等奉

如是我聞一時佛在王舍城迦蘭陀
竹林精舍與苾芻衆俱

時有尊者名曰隨勇在王舍城側尸

陀林間蛇聚孤峯之上大僧坊中而

獨經行忽爲毒蛇之所噬蝨蛇之身

形瘦細精光猛惡可畏如安惹那舍

羅迦即時隨勇尊者呼苾芻衆謂言

諸尊者我爲毒蛇之所噬蝨膚體潰

壞今宜置我於僧坊外無令延毒而
復流散

是時尊者舍利子去隨勇尊者所止
不遠在一樹下坐聞彼隨勇發如是
言聞已即時往詣其所到已謂言尊
者隨勇我向觀汝面及諸根本無異
相何故今時乃發是聲隨勇答言尊

者我爲毒蛇之所噬蝨膚體潰壞今
宜置我於僧坊外無令延毒而復流
散尊者舍利子若我取著眼是我眼
是我所耳鼻舌身意是我意是我所
色是我色是我所聲香味觸法是我
法是我所地界是我地界是我所水
火風空識界是我識界是我所色蘊
是我色蘊是我所受想行識蘊是我

識蘊是我所我若取著如是等法面
及諸根可有異相尊者舍利子我不
如是取著諸法謂眼是我眼是我所
乃至識蘊是我識蘊是我所今此何
故面及諸根有是異相舍利子言尊
者隨勇若我我所見及我慢等斷取
著已復能了知所斷根本永斷無餘
如破多羅樹心不復更生證無生法

者彼復何有異相可得時尊者舍利
子以尊者隨勇置僧坊外僵仆于地
尔時尊者舍利子即說伽陀曰

智者善行於梵行 復常善修正道因
臨捨壽時喜心生 如重病入得輕羗
智者善行於梵行 復常善修正道因
臨捨壽時喜心生 猶如棄置惡毒器

智者善行於梵行 復常善修正道因
能顙脫於捨報時 如人出離於火宅
智行梵行修正道 悉觀世間如草木
都無義利無所成 畢竟一切無繫著
今時尊者舍利子爲隨勇尊者安置
事已往詣佛所到已頭面禮世尊足
具陳上事佛言舍利子彼隨勇善男
子若於今時得聞我說勝妙伽陀及

大明章句彼定不爲毒蛇所蝨潰壞
其身舍利子白佛言世尊何等勝妙
伽陀何等大明章句願爲我說

尔時世尊即說伽陀曰

持國天王我行慈

愛羅嚩尾龍亦然

阿說多哩劍末羅

悉體埵子悉慈愛

廣目天王我行慈

黑曜曇龍慈亦然

難陀烏波難陀龍

彼二行慈亦如是

我於無足行慈愛二足四足亦復然
及彼多足諸有情等行慈心悉無異
一切龍等行慈愛彼龍棲止大海中
於諸有情普慈心若情若器皆如是
所有一切有情類乃至蛸飛及蠕動
普願銷除病惱因一切獲得安隱樂
所有一切有情類乃至蛸飛及蠕動

普以賢善平等觀一切除諸罪惡
蛇之爲毒極猛熾其毒能壞人身命
而彼蛇窟山峯中我常處之而游上
我爲無上世閒師我常宣說真實語
以我真實語業因我身蛇毒不能入
所有貪瞋及癡法此三世閒爲大毒
世尊大覺毒不侵佛真實力能破毒
所有貪瞋及癡法此三世閒爲大毒

世尊正法毒不侵 法真實力能破毒

所有貪瞋及癡法 此三世間爲大毒

世尊淨衆毒不侵 僧真實力能破毒

世間所有諸毒中 而彼貪毒最爲上

唯佛能破能攝持 由斯諸毒皆息滅

今時世尊說大明曰

怛^切寧^身佗^佗一句 唵^引凍蜜里^{引二} 凍蜜

里^{引三} 凍彌^{引四} 鉢囉^{二合} 凍彌^{引五} 那

致引六蘇那致引七計引嚩致引八母那

曳引九薩三摩曳引十難帝引十一難底里引十二

泥引里引十泥引羅計引尸引十嚩引里引十

嚩引羅計引尸引十盟里引十泥羊二合虞引

里引莎引賀引十

佛言舍利子彼隨喜善男子若於今時得聞我說如是伽陀及大明章句

佛說隨喜尊者經

彼定不爲蛇毒所蝨潰壞其身舍利
子白佛言世尊如佛今說勝妙伽陀
及此大明章句彼隨勇苾芻蛇所蝨
時離於佛所如是妙法其云何得

尔時尊者舍利子說是語已頭面著
地禮世尊足出於佛會

佛說隨勇尊者經

講百法論金剛經梵網經沙門目重宋證義

講法華經上生經賜紫沙門目智遠證義

講法華經上生經賜紫沙門目身初證義

講法華經上生經賜紫沙門目作維證義

講金光明經起信論玄旨經上生經賜紫沙門目行筆證義

講金光明經觀無量壽經說覺大師賜紫沙門目智臻證義

講法華經圓照大師賜紫沙門目道一證義

佛身寶卷

第九張

談字

右街監義講全副經四論百法論明雅大師賜紫沙門日啓沛證義

講圓覺經文章智印大師賜紫沙門日簪長綴文

梵學慧悟大師賜紫沙門日文一筆受

梵學演法大師賜紫沙門日珠筆受

胡散大夫試鴻臚卿光梵大師賜紫沙門日惟湄奉詔同譯

胡散大夫試鴻臚少卿栗傳梵大師賜紫沙門日法護奉詔同譯

仁王般若陀羅尼釋

銘

大興善寺三藏沙門大廣智不空奉

翻譯

金剛手者瑜伽經釋云手持金剛杵
表內心具大菩提外表摧伏諸煩惱
故名金剛手又釋云不被三種魔破
壞菩提心自體堅固成金剛智一切
如來之所建立能破斷常二邊是故

金剛智杵破邪見山證金剛定常持
於掌中故名金剛手

云何菩提薩埵義覺悟真實法覺已
住生死令覺悟一切有情故名菩提
薩埵又云菩提者能覺義薩埵者有
情義亦云心亦云勇健摩訶者大義
薩埵者是勇健義不怯弱三大無數
劫積集二種資糧故名摩訶薩

云何金剛摩尼

此譯云寶

金剛如前釋寶

義有六一者難得故二者淨無垢故
三者有大威德故四者莊嚴世間故
五者殊勝無比故六者不變易故一
難得者如來出現於世間甚難逢遇
故二淨無垢者依教修行證得菩提
淨無垢故三大威德者具六神通變
現自在名大威德故四莊嚴世間者

以三種菩薩律儀戒嚴飾身心故五
殊勝無比者證得無上菩提三界特
尊殊勝無比故六無變易者證得究
竟無上菩提不變易故金剛摩尼顯
名虛空藏菩薩是故此菩薩手捧金
剛寶

金剛利者般若波羅蜜金剛利劍能
斷煩惱種一切種金剛利者顯名文

殊師利菩薩是故此菩薩手持金剛劍
金剛藥又菩薩者金剛義如前釋藥
义者威猛義亦云盡義十六金剛智
普賢行中第十五智名金剛盡智以
金剛藥又智牙食啗一切煩惱隨煩
惱盡無餘

金剛鈴者表般若波羅蜜義振鈴警
悟愚昧異生一聞鈴音覺悟般若波

羅蜜顯名摧一切魔怨菩薩是故此
菩薩手持金剛鈴

金剛波羅蜜多菩薩者金剛義如前
釋波羅蜜多如先輩所釋到彼岸義
今依聲明論分句釋波藍伊^上多波
藍彼岸義伊^上多此岸義此菩薩由
持金剛輪毗盧遮那佛於上界成佛

已此菩薩請如來轉金剛乘法輪由
乘此法輪般若船從此岸運載無量
無邊有情至無住涅槃岸顯名纔發
心轉法輪菩薩

娜謨囉怛那怛囉夜耶歸命三寶義
若持此經人歸命佛寶即得五族金
剛手菩薩以無量眷屬侍衛加持其

入此菩薩尊貴菩提心佛從菩提心
生故歸命法寶則得天帝釋并眷屬
四天王天加護何以故帝釋在危難
般若加持現獲利益是故天帝釋尊
貴法寶歸命僧寶者則得阿迦尼吒
天王并五淨居天并眷屬加護持經
者爲五淨居菩薩僧并聲聞僧衆常
居彼天現法樂住梵天等悉皆貴重

娜莫阿哩夜吠路者娜野怛佗薩多
夜囉訶諦三藐三沒馱野 娜莫者
歸命義亦云稽首亦云頂禮阿哩夜
遠惡義此方會釋云聖者 吠路者
娜野徧照義亦云大日義如世間日
照一邊不照一邊照晝不照夜照一
世界不照餘世界但得名曰不得名
大日毗盧遮那大日者色身法身普

周法界及虛空界無邊十方世界普
皆照耀若人知此佛功德利歸命禮
拜則得盡虛空徧法界一切諸佛菩
薩諸賢聖八部悉共加持護念也

怛佉摩多夜囉訶諦三藐三沒馱野
如來應供正徧知義先已釋 娜莫
阿哩野已釋 三滿多跋囉野三

滿多者是普義跋捺囉者賢義野字
者聲明中七例八轉聲中謂聲也下
同此菩薩說三密門普賢行願一切
諸佛若不修三密門不行普賢行得
成佛者無有是處旣成佛已於三密
門普賢行休息者亦無是處冒地薩
怛縛野菩薩義摩賀薩怛縛野大菩
薩義摩賀迦嚕拏迦野大悲者若歸命

聖普賢菩薩則十方諸佛菩薩悉皆
加護一切諸佛菩薩皆因修三密門
行普賢行得證聖果是故尊貴但你
也

合二

佗古云即說所謂已上文歸命

三寶毗盧遮那佛普賢菩薩

杳穰

娜鉢囉你閉

顯句釋智燈義密句

釋智無所得以為方便無智無得即
成般若波羅蜜智燈能照一切佛法

惡 此惡字梵本是姁字爲隨文句
便作惡呼乞又合二野句勢顯釋無盡
藏義密句釋姁字一字爲種子姁字
者一切法本不生故姁字是一切字
之母能生一切法若能曉姁字門瑜
伽相應則得佛法無盡藏則悟一切
法本不生猶如虛空一相清淨平等

即成無分別智也

鉢囉

合二

底婆

娜縛

底顯

句釋

具辯才

密句釋於此句中取鉢囉

合二

一字爲

種子鉢囉字者

般若波羅蜜無所得故以無所得爲
方便於後得智中悟一切法因緣生
諸法故由證一切法本不生故獲得
無盡佛法藏於後得智中得四無礙

解辯說法自在薩縛 沒駄縛路枳

諦 顯句釋一切佛所觀察義密句

釋薩字一字爲種子薩字者一切法平

等義能緣所緣平等平等能取所取

無所得故則證真如當於法流無邊

諸佛觀察護念

喻譏跛哩你澀跛_{合二}寧顯句釋瑜伽圓

成義密句釋喻字一字爲種子喻字

者一切乘無所得若瑜伽觀智相應
證得圓成於諸乘中教理行果悉皆
證得一真如法性 儼避引囉努囉縛
誡引係顯句釋甚深難測義密句釋儼
字一字爲種子儼字者一切真如法無
去無來由證真如海實相般若不可
以言詮唯佛境界自覺聖智證 底哩

野三合特躡跛哩你澀跛 寧顯句釋三世

圓滿成就義密句釋底哩野三合梵字以是一字也

此一字為種子底哩野者一切法真如
平等自性成就越恒河沙數功德真如
中無過去未來現在妄分別不相應
行蘊堅執惑亂有為之法 冒地質多
散惹娜你 顯句釋能生菩提心義
密句釋冒字一字為種子冒字者一切

法無縛義若知自身中菩提心自性成
就三世平等猶若虛空離諸萬像則
知一切有情心及諸佛心如自心清淨
則生大悲深生矜愍則起種種方便令
一切有情至於究竟離苦解脫無解
無縛薩躡毗驪迦毗色訖諦顯句釋一
切灌灑得頂義密句釋薩字一字爲種
子薩字者一切法無染著義由觀察

自佗及諸佛心同一真如同體大悲是
故不染不著則於空中一切如來法
水灌頂則獲三業加持於無量修多
羅藏說法自在達磨娑訶囉三步諦
顯句釋法海出生義密句釋達字一
字爲種子達字者一切法界無所得
義由住無所得心阿賴耶識中俱生

我執俱生法執種子以文殊大聖金
剛利劍永截斷無餘義則流出清淨
法界等流教法則成法海出生義達
字者文殊師利菩薩種子 阿暮伽

室囉嚩儂

顯句釋阿暮伽古釋不

空義今依聲明論釋無間義阿字一
字爲種子阿字者一切法本來寂靜
本來涅槃由證此解脫法印徧周法

界及諸佛刹大集會中於佛前所聞
教法悉皆住持永不忘失 摩賀三
滿多跋捺囉步弥涅哩野諦顯句釋
出大普賢地義密句釋摩字一字爲
種子摩字者一切法無我義無我有
二種人無我法無我瑜伽者若證二
無我則出大普賢地證毗盧遮那百
福莊嚴圓滿清淨法身尾野合羯羅

拏跛哩鉢囉跛你顯句釋獲得記別
義古文授記義密句釋尾野合二一字
為種子尾野字者一切法徧滿不可
得義即知一切法自性寂靜自性涅
槃能證所證皆同一性不增不減圓
證法界 薩躡悉駄娜麼塞訖哩合三諦
顯句釋一切成就者禮敬義成就者

菩薩之異名密句釋薩字一字爲種子薩字者一切法無堅固義念念四相遷流滅壞薩字中有姪字若證姪字門本來不生不滅亦常恒堅固喻若金剛心得自在能現種種身薩嚩曷地薩怛嚩_合散惹娜你顯句釋薩出生一切菩薩義密句釋薩字一字爲種子薩字者一切法無等義由

觀此字心與般若平等平等前剎那
後剎那一相清淨能生一切波羅蜜一
切地即名般若佛母 婆誡縛 底沒
馱麼諦 顯句釋卅尊佛母婆伽梵男
聲婆伽縛底女聲二俱會意釋名卅
尊義依聲明對敵釋不如是婆伽者
破義梵能義能破四魔名婆伽梵又
一釋薄阿梵依聲論分字釋薄名爲

破阿梵具知阿字云不有亦云不無
佛由悟一切法不生不滅不來不去
不一不異不常不斷不增不減佛有
如是功德故名薄阿梵又釋云薄伽
梵具福智二種資糧二種資糧者婆
伽縛底女聲義釋如前密句釋婆字
一字爲種子婆字者一切法有不可

得有者三有義是故三界唯心由心
雜染有情雜染由心清淨有情清淨
若依顯教觀行般若作爲生因顯因
能生一切佛菩薩是故名佛母從前
即說已後至佛母句於瑜伽教中成
普賢行十六行如聲聞乘見道中十
六行也 阿囉妳迦囉妳阿囉拏迦
囉妳 阿字門一切法本不生由知

一切法本不生即入一切法離塵是
故囉字門一切法離塵義由知一切
法離塵故即入一切法無諍是故妳
字門一切法無諍由知一切法無諍
故即入一切法無造作是故迦字門
一切法無造作由知一切法無造作
故即入一切法清淨是故囉字門一
切法清淨由知一切法清淨故即入

一切法無諍是故妳字門一切法無諍
由知一切法無諍故即入一切法本來
寂靜是故阿字門一切法本來寂靜
由知一切法本來寂靜故即入一切
法無垢是故羅字門一切法無垢義
由知一切法無垢故即入一切法無
諍是故拏字門一切法無諍由知一

切法無諍故即入一切法無造作是
故迦字門一切法無造作由知一切法
無造作故即入無分別智是故囉字
門一切法無分別由知一切法無分
別故即入一切法無動是故妳字門一
切法無動由知一切法無動故即證摩
訶般若波羅蜜

摩賀鉢囉枳孃播囉弭諦顯句釋摩
賀大慧到彼岸證得大般若波羅蜜
故即依無住涅槃
娑嚩引合賀引顯句
釋無住涅槃則依無住涅槃乃至盡
未來際廣利樂無邊有情
仁王般若陀羅尼釋

觀心論

亦名觀心論

計六帙

天台智者大師說

問曰佛經無量論亦甚多引法之人說說蓋世聽受之衆無處不有是則法雨普津四衆霜潤利益無邊何所見聞更何利益而欲造論耶答曰如所問言佛經無量論亦甚多是事共知但引法之人爲物故多加水之乳致令聽受之人失真道味四衆轉就澆漓致使信心之者漸漸歇淡將恐深廣大法不久傳留衆生眼滅失正法利是以閑坐悲傷煩冤難忍不惟凡淺寡聞少見欲盼鸚鵡奮其翅方故作斯論也問者欲知作論意者有二一者自責爲諸學徒二者外諸四

衆脫能信受亦可傳之以偈荅曰

大師將涅槃 慈父有遺囑 四念處修道 當依本又住
我等非佛子 不念此遺囑 乘緩內無道 戒緩墮三塗
由不問觀心 令他信漸薄 烏鴉不施食 豈報白鴿恩
非但田不良 無平等種子 法雨若不降 法種必焦枯
各無來世糧 失三利致苦 大法將欲殯 哀哉見此事
為是因緣故 須造觀心論 平等具法界 無行亦無到
若能問觀心 能行亦能到 即是四念處 能依本又住
乘急內有道 戒急生人天 此是具佛子 不乖慈父囑

天龍皆慶喜 一切豈不忻 能報白鷄恩 普施烏鷄食
既有好良田 有平等種子 法雨應時降 法種皆生長
各有來世資 俱獲三利樂 爲是因緣故 須造觀心論
諸來求法者 欲聞無上道 不知問觀心 聞慧終不發
諸來求法者 欲思無上道 不知問觀心 思慧終不發
諸來求法者 欲修無上道 不知問觀心 修慧終不發
諸來求法者 勤修四三昧 不知問觀心 困苦無所復
諸來求法者 多聽得言語 不知問觀心 未得真實樂

諸來求法者 修三昧得定 不知問觀心 盲禪無所見
諸來求法者 欲懺悔衆罪 不知問觀心 罪終難得脫
諸來求法者 意欲離煩惱 不知問觀心 煩惱終不滅
諸來求法者 本欲利益他 不知問觀心 退轉令他謗
諸來求法者 欲興顯佛法 不知問觀心 退還大污損
如此衆得失 非偈可具傳 有此諸得失 無人覺悟者
爲是因緣故 須造觀心論 末世修觀心 得邪定發見
辯才無窮盡 自謂人間寶 無智者鼻鯨 野狐氣衝眼
舉尾共却行 次第墮坑塹 爲是因緣故 須造觀心論

守鼻隔安般 及修不淨觀 安般得四禪 不免泥犁苦

不淨謂無學 覆鉢受女飯 設得隨禪生 情衰壽夭難

為是因緣故 須造觀心論 依事法用心 無慧發鬼定

顯異動物心 事發壞佛法 命終生鬼趣 九十六眷屬

像法決疑明 三師破佛法 為是因緣故 須造觀心論

內心不為道 邪諂念名利 詐現坐禪相 得名利眷屬

事發壞他信 毀損佛正道 此是扇提羅 死墮無間獄

為是因緣故 須造觀心論 說法得解脫 聽法眾亦然

不知問觀心 如貧數他寶 說者問觀心 無說亦無示

聽者問觀心 無聞亦無得 爲是因緣故 須造觀心論
戒爲制心馬 雖持五部律 不知問觀心 心馬終不調
律住持佛法 解外不解內 淨名訶上首 乃名具奉律
爲是因緣故 須造觀心論 誦經得解脫 非爲世財利
若能問觀心 破一微塵中 出大千經卷 受持讀誦者
聞持無遺忘 心開得解脫 爲是因緣故 須造觀心論
勸化修供養 興顯安行人 密心爲自利 倚託以資身
壞他喜捨善 駝驢以償人 若能問觀心 即如駝驢也
爲是因緣故 須造觀心論 諸道各有法 了不自尋研

忽聞闍釋放 動經十數年 非但彼法拙 亦有謀壞心
此是迦毗梨 仙聖豈聽說 為是因緣故 須造觀心論
富貴而無道 多增長憍逸 若能問觀心 得真法富貴
雖高而不危 雖滿而不溢 不著世富貴 心常在道法
為是因緣故 須造觀心論 貧賤多茲詔 闍闍造眾惡
現被王法治 死墮三惡道 若能問觀心 即安貧養道
有道即真實 無為即富樂 為是因緣故 須造觀心論
四眾皆佛子 無非是法親 因執善法諍 遂結未來怨
若能問觀心 和合如水乳 皆師子之子 悉是稱檀林

爲是因緣故 須造觀心論 年衰身帶疾 眼瞶耳漸聾
心昏多忘漏 年不如一年 死王金翅鳥 不久吞命根
一旦業繩斷 氣絕豈能言 爲是因緣故 須造觀心論
稽首十方法 深慈觀心者 勸善諦觀察 發正學好樂
稽首十方佛 深悲觀心者 勸善諦觀察 得具免諸苦
稽首十方僧 大衆和合海 若能善觀察 歡喜心無量
稽首龍樹師 願加觀心者 令速得開曉 亦加捨三心
今承三寶力 起三十六問 其間諸細問 對事難可數
若觀一念心 能答此問者 當知心眼開 得入清涼池

不能答此問 柰何盲瞶者 少義尚不見 那能行大道
哀哉末法中 無復行道入 設今有三數 寧別此問也
故生悲愍心 歸命礼三寶 作此問心 令觀者開朗
願諸見聞者 莫生疑謗心 信受勤修習 必獲大法利
問曰何故作此問心論答曰末代數寶貧乏本不預此言論若坐
禪觀行之者但守鼻端不淨安般此亦面牆何可論道諸有觀心入
道得定生解辯說無窮自謂人間之寶豈知邪慢熾然也今作此問
若句句不知何得未得謂得未證謂證法華勸持品說此人難可化
度也又常不輕品威音王如來去世之後如此之類甚多非一復以

傷念二家門徒隨逐積年着心稍久遂不知研覈問心是以不滌內
法著外文字偷記注而奔走召經論而浪行何不絕言置文破一微
塵出大千經卷念此迷徒隨逐累載空無所獲脫一旦冥目誰復示
之以是因緣悲切轉至故作斯論摩訶般若波羅蜜經明四十二字
門初云若聞阿字門即解一切義所謂一切法初不生也龍樹菩薩
造中論釋摩訶衍經正意以不生等入不以開論端用一偈釋初不
生云諸法不自生亦不從他生不共不無因是故說無生今但問觀
初自生一句起三十六問若於觀心能答此問無滯者當知此行人
六種即中入觀行即五品弟子即是入初隨喜心住故法華經云乃

至問句通達無量義次第如法說月四月至歲也論曰

問觀自生心

云何四不生

離戲論執諍

心淨如虛空

問觀自生心

云何是魔行

業煩惱所繫

三界火宅燒

問觀自生心

云何是外道

諸見煩惱業

流轉於六道

問觀自生心

云何是三乘

拙度斷見思

出三界火宅

問觀自生心

云何是巧度

三乘不斷結

得入二涅槃

問觀自生心

云何是別教

求大乘常果

菩薩斷別惑

問觀自生心

云何圓教乘

不破壞法界

住三德涅槃

問觀自生心

云何為涅槃

修四種三昧

得真無生忍

問觀自生心	云何巧成就	二十五方便	調心入正道
問觀自生心	云何知自心	起十種境界	成一心三智
問觀自生心	云何知十境	各成十法乘	遊四方快樂
問觀自生心	云何不住法	入初發心住	及四十二位
問觀自生心	云何六度成	能得諸三昧	及諸陀羅尼
問觀自生心	云何得六通	用四攝行化	四辯無罣礙
問觀自生心	云何得相好	成真應二身	對緣如鏡像
問觀自生心	云何具十力	及四無所畏	內外照用圓
問觀自生心	云何於觀心	不共世間法	能得十八種

問觀自生心

云何得大慈

大悲三念處

愍衆無異想

問觀自生心

云何巧方便

成就諸衆生

嚴淨一切刹

問觀自生心

云何於此心

莊嚴菩提樹

建清淨道場

問觀自生心

云何降魔怨

能制諸外道

令衆悉歸敬

問觀自生心

云何坐道場

現四種成佛

赴機無差殊

問觀自生心

云何轉四教

清淨妙法輪

一切得甘露

問觀自生心

云何現四佛

四種涅槃相

究竟滅無餘

問觀自生心

云何知依正

四土天器同

而飯物有異

問觀自生心

云何於此心

見一切根緣

通達無罣礙

問觀自生心

云何知悉檀

無形無所說

現形廣說法

問觀自生心

云何知漸頓

祕密不定教

一音說此四

問觀自生心

云何知四教

各開出四門

及一切法門

問觀自生心

云何於四教

四門十六門

作論通衆經

問觀自生心

云何住滅定

普入十法界

廣利諸衆生

問觀自生心

云何知四土

用教有增減

普利一切衆

問觀自生心

云何知此心

具一切佛法

無一法出心

問觀自生心

云何知此心

即平等法界

佛不度衆生

問觀自生心

云何知此心

法界如虛空

畢竟無所念

問觀自生心 云何無文字 一切言語斷 寂然無言說
今約一念自生心起三十六問問外觀心人及久相逐眷屬行四種
三昧者彼觀心者若能一二通達當生心如佛想親近受行如四依
也門徒眷屬若於此無滯是具前行是法王子孫紹三寶種使不斷
絕若不能觀於一念自生心一一答此問者即是天魔外道眷屬爲
彼之所驅馳方處三東牢獄未有出離之期若心不愜欲求免出者
必墮三乘三惡道坑自斷法身慧命誅滅菩提眷屬是具破佛法國
王大乘家業哀哉哀哉知奈何也若觀自生心得失如此觀他生共
無因生心亦然也